



## INATSISARTUNI

Partii Inuit  
Randi Broberg

UPA 2014/19-1  
8.4.2014

**Pillugu kaammattuut: Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalakkersuisunut kaammattuutigaa allanniarnermik atuarniarnermillu ajornartorsiuteqartunut atuartinneqarnissamik neqeroorut suleqatigiillutik nukittorsassagaat. Assersuutigalugu suliasaqarfinni ataatsimut ilisimatusarnikkut aammalu nunat oqartussaasuisa susasaqartut suleqatigiinnissaata qulakkeerneratigut, taamaalilluni ilisimasanik iliutsinillu pitsaanerpaanik avitseqatigiinnissaq qulakkeerneqarsinnaaqullugu.**

(Aallartitat siulittaasuat Lars-Emil Johansen)

Partii Inuit maluginiarparput, Nunat Avannarliit Killiit Siunnersuisoqatigiiffiata kaammattuutigaa, naqinnernik atuisinnaanermikkut aporfeqartut, ilinniartitaanikkut neqeroorfigineqartarnerisa nukittorsaavigineqarnissaa.

Partii Inuit kaammattuut iluatigalugu, tamakkiisumik taparserparput, kaammattuummullu atasumik imaattunik tikkuagaqarusulluta:

1.

Partii Inuit immikkut maluginiarparput naalakkersuisup oqaatigigaa, naqinnernik atuisinnaanermikkut aporfeqartut pillugit suliniutini misilittakkanik katersiniarneq annikitsuarsuarmik aallunneqartoq.

Tassani Partii Inuit erseqqissaatigerusupparput, Nunatsinni inulerineq suugaluarpalluunniit, misilittakkanik katersisarneq, oqaatigilluaannarlugu, suunngitsumik annertussuseqarmat.

Tamanna Partii Inuit ilungersunartut illersorneqarsinnaanngitsutullu nalilerparput. Allatut oqaatigalugu inulerinerup iluani inuiaqatigiinni suliniuterpassuit asuli aningaasalersorneqarput – nakkutiginatigu aningaasat atugassiisutit ilumut inuiaqatigiinnut iluaqutaanersut sunniuteqarnersulluunniit.

Tassunga ajornartorsiummut ilungersunartumut illersorneqarsinnaanngitsumullu, Partii Inuit naliliinerput tunngavigalugu tamanna aallaaveqarpoq;

- a) qinikkat allanik ukkitaaruttutullusooq ilillutik tikisitanik sulisoqarusunnerujussuannik. Tikisitanik sulisoqarneq uagutsinnut tupinnaannartumik angalanernut, pisattat angallannerinut, akissarsianut, pikkorissartitsinernut, ilinniaqqinnernut, tikisitat meerartaasa atuartinernut, tikisitat meerartaasa Danmark’imi ilinniartinnerinut naak



## INATSIARTUNI

nalunatigu 70%’ii uteqqinnaviangitsut, allaffissornikkut oqaatsit marluk atorlugit ingerlatsinermut ilarpassuilu ilanngullugit,

- b) naak tikisitanut aningaasaliissuterpassuit 1979’imiilli ukiut tamaasa atortaraluarlutigik, ulloq manna tikillugu misilittakkanik katersineq annertunerusumik ingerlanneqarnikuunngilarput.

Allatut oqaatigalugu qinikkat nalilersuinissartik soqutiginiikuunngisaannarpaat, tamannalu qitiusumik ajornartorsiutaavoq sulii.

Tassani tikisitat sivikitsuinnarmik maaneereerlutik utertarput pisuunnguallassimallutik, uagullu inuiattut piitsunnguallassimasarluta.

Manna iluatsillugu Partii Inuit naalackersuinikkut suliniaqatigiiffinnut inatsisartunilu ilaasortaataqartunut tamanut, qamanga pisumik eqqarsaatigeqqussavarput, una Nunat Avannarliit Killiit Siunnersuisoqatigiiffiata kaammattuutaa aallarnerfigalugu, siunissami qaninnermi ungasinnerusumilu anguniassagippat, suliniutini pingaarutilittut isigisatta iluini, misilittakkanik katersisarnerup ileqqunngortinneqarnissaa – tikisitat atornagit uagulli nammineq isumagisatsinnik.

2.

Inaarutaasumik Partii Inuit aarleqqutigisarput erseqqissaassuteqarfigiinnassavarput. Tassalu ullumikkut tikisitanik allanik ukkitaarulluta atuinerujussuarput illuatungaanut saatinneqanngippat, sulii ukiorpassuit utaqqisariaqassasugut, misilittakkanik katersisarnerup aallartinnissaanut – naak inuiattut ineriartornitsinnut sukaterinitsinnullu qitiusumik pingaaruteqaraluartoq.

Partii Inuit taama oqaaseqaateqarluta, kaammattuutip suliatut ingerlateqqinneqarnissaa soqutigalugu akuersaarparput.